

# JUECES

## Jawen unanmati janchaki

Josué inun ja unanepabu Diosun yunuti inun jawen nemati Diosun yusini jabubetan yunukin yusinkubaini ma mawabun Israelin enabun ana jawa shinanma jawen yunuti inun jawen nemati ana chibanma jaska ibubis bechipaiai keska jiwekin jabun Dios ikunwanbuma jatu dapi jiweabu Canaán nawabu keska jiwekubainibukiaki, jatun yushibu tibi chibankin kenwankinan, Jehová Diosun jancha ana ninkakin chibankatsi ikamadan. Jaskawen taexun jau nawa betsa betsapabun jatu ichakawanunbun Diosun jatu jenekubainikiaki. Jaska wabiaibun jaska Abraham inun, Isaac inun, Jacobube yubakani Dios jakimama yununika kushipabu Diosun jatu katuxunikiaki, jau ana jawen jancha ninkakin chibankubainunbunan.

Na una jiwenibu miyui ikidan, ja año ikubidanibudan, 1350-1050 Cristo judiama inibukiaki. Jakia xanen ibujaida Saúl ma mawaimaken jaska kenenibukiaki, ja año 1080-1000 Cristo judiamatianan.

---

### Boquim mae anuxun Jehován nai tsuma kushipatun jatu ja anikiaki, na janchadan

**2** <sup>1</sup>Josué mawaimaken Guilgal mae anua Israelin enabu bei Boquim mae anu ma icha maniabu anu Jehován nai tsuma kushipa taxnitan jatu yuikin: “Egipto anua matun ibubu jatu paxawabidanimaxun jatube yubakakin jatu yuikin: ‘Na eska en matube yubakaidan, en matu jenetaskama iki kaii’, iwanan, <sup>2</sup>Jamen matu ikidan, ja nawabu ja jadi mae anu jiweabube jatube yubakataskayamaxankanwen. Jaska inun, jatun yushibubun kenwanti chi tapu tibi teke keyukubainxankanwen. En matu wabidani uinkanwen. ¿Jaskai man chakabube ketaxamea jiwekatsis ikubainkanai? Man jaskaibun en matube yubakani en jakimama ixanaai’, akin en jatu wabianiken en jancha ea ninkama man ea danankanaii. <sup>3</sup>Man jaskamiswen taea matu bebunxun natian na nawabu texe ana jabu en ja matu nichinxunamaki. Matu padankin jabu inun jatun yushibubun bidunwen matu kebenkin akawaxankanikiki”, jatu wai

<sup>4</sup>Jhován nai tsuma kushipa janchai ma menekainaya janua Israelin enabu juinti nishmajaidatan kaxa chakayamai bis bis ikasima <sup>5</sup>nesebaun

Jehová daewanun, iwanan, chaxuwan inun awa ichapa tesenxun chiwen Jehová menukin keyuxunibukiaki. Jaska watan ja mae kenakin: “Boquimki”, anibukiaki, nukun janchawenan, Kaxa Maedan.

**Josué mawanikiaki, na janchadan**

*(Jos 24.29-31)*

<sup>6</sup>Janu Josué jiwexun jawen jenekin jawen jancha jatu yuishina ninkatan Israelin enabu tibi jatun mae ibubis jau tsumakin ibuwaxanunbun jatu yunua buaibun <sup>7</sup>Josué jiweyukun Israelin enabu Jehová Dios kenwankin duawanibukiaki. Ja dikabi ma Josué ma mawabaiimaken anibu unanepabun jaska Jehová Diosun jatunabu dami waxunkin jatu medabewakubainai uinkubidanibu jiweyuabun Israelin enabu Jehová ninkakin duawakin jeneabuma idiakubainibukiaki. <sup>8</sup>Jakia 110 badiya Josué mawaken <sup>9</sup>Efrañen enabun mati mananan anu Mati Gaas nortekidi Timnat-sérah anu jawen mae anu Josué maiwanibukiaki. <sup>10</sup>Ja dikabi Israelin enabu ma Josuébe jiwekubidanimabu mawadiai keyukubainaibun jabun Jehová kushipa uinibu ma debui keyudiabun chipu kinkubidanshinabu Jehová kidi inun jaska Jehová Israelin enabu medabewakubidani jabun ana jawa unanbuma jiwei taebainibukiaki.

**Jehová jancha ana chibankatsi ikama jenenibukiaki, na janchadan**

<sup>11</sup>Jehová jatu uinbia jaska shinanma Israelin enabun chakabuwakin yushibubu jabun kena tibi Baal ui itsa inun, badi itsa inun, mai pepa itsadan, duawakin jatubetan kenwankin taewai <sup>12</sup>jatun xenipabun mekenika Dios Jehová Egipto anua jatu iwebianiken jabun ninkama ana shinankatsi ikama jenetan ja nawabu jatu dapi jiwebaunabubetan jabun yushibubu duawakin kenwankin Israelin enabun Jehová sinatamanibukiaki. <sup>13-14</sup>Jehová ana shinanbuma yushibubu Baal inun yunu ichapa inun inabu bake ichapa bitidu mekenika yushin jawen kena Astarté kenwainbuwen taea Israelin enabuki Jehová sinatakin jatu dapi jiwea yumetsubu jatu yunukubainaya jatun yunu inun jatun inabu jatu yumetsunkubainaibun jatu jaska wakin jatuki sinataibun jatu ichakawaibu uinbiakin jatu ana nemaxunama Israelin enabun jaskatan jawawen jatu nematidubuma ikubainibukiaki. <sup>15</sup>Janua jatube detenameaibutian bestikima jabu jatu kupimakin ichakawamakubainikiaki, jaska Jehová jatube bebunkidi yubakaima jatu ana medabewamadan. Jehová Diosun Israelin enabu jatu nuitapawabiakin

<sup>16</sup>ana jatu medabewanun ixun xanen ibu unanti wanikabu betsa betsapa jatu katuxun taxnimakin yununika kushipabu jatu wa jabun Israelin enabu medabewakin tsuabunda jawenabu ichakawaibu jabube detenamekin ja xanen ibu unanti wanikan jatu nichinxunkubainkin

jawenabu Israelin enabu medabewakubainbia <sup>17</sup>jakia ja xanen ibu unanti wanikabun jancha Israelin enabun ninkabuma patapakin Jehová jancha chibanma yushibubu betsa betsapa chibankin duawakin kenwanpaunibukiaki. Jatun xenipabun Jehová jancha ninkakin chibanpaunibu keska akama jatun bai tanama inibukiaki, betsa betsapa chibankinan. <sup>18</sup>Israelin enabu jatu ichakawaibun bika tenei kaxaibu ninkai jatuwen nuikin xanen ibu unanti wanika kushipa betsa katuxun taxnimatan Jehová jatu medabewakubainaya ja xanen ibu unanti wanika kushipa jiwekunkainkin Israelin enabu ichakanikabu jatu nemaxunkubainaya <sup>19</sup>jakia jatun xanen ibu unanti wanika kushipa tibi mawakubainaibun jatun chakabu shinain ana chintuin yushibubu betsa betsapa duawakin kenwain jatun epabu binui chakabu pikui jatun beya chakabu jenekatsi ikama inun jatun juinti kushi pewakatsi ikama ikubainibukiaki. <sup>20-21</sup>Jaskaken Israelin enabuki Jehová sinatakin yuikin: “Jaska jatun xenipabube en yubakabiani ea danankin en jancha ana ninkakatsis ikabumawen taexun yuda betsa betsapabu Josué nichindiana mawaniken eandi en jatu nichinxunamaki”, ixun <sup>22</sup>jaska jatun xenipabu en jancha chibani keskakin Israelin enabun chibankatsi ikanimenkain, chibankatsi ikabuma daka, iwanan, jatu unanti wakin Jehová jatu uinkin manakubainikiaki. <sup>23</sup>Jaskawen taexun nawa betsa betsapabu Josué jatu nichinxunama ini jiweabu jatun mai pakea anua Jehová jawaida jatu medabewakin nichinxunama idianikiaki.

\*\*\*\*\*

#### Débora inun Baracnen Sísara maemanibukiaki, na janchadan

**4** <sup>1</sup>Jehová unanti wanika kushipa betsa Ehud ma mawaken janua Israelin enabu ana chakabui chintuntan jatun jiwea peama chakabuwaibun Jehová Dios jatuki sinataiwen <sup>2</sup>taexun Jehová jatu nemaxunama Canaán nawa xanen ibu Jabín jatu maemanikiaki, jawen mae ewapa Hasor anua xanen ibukinan. <sup>3</sup>Jabínen detenamenikabu xanen ibu mentsisipa jawen kena Sísara, mae ewapa betsa Haróset-goím anu jawen jiwe ewapa jadi jayanikiaki. Jawen 900 hierro mane caballo tadanti detenamenikabu mapuxun Israelin enabu jatu bikajaida tenemakin ichakawakin 20 año jatu nuitapajaidawakubainaya jau jatu medabewanun atimas Israelin enabun jatun Jehová ea akin taewaibun <sup>4-5</sup>jabiatiandi Israelin enabu ichakawakubainaibun Lapidotin ain Débora, ainbu unanepa Diosun jancha yuixunikatun jancha pepawen yusinkin jatu medabewakubaini Jacobun juni bake Efraínen enabun maiwan pakea mati matipa anu mae Ramá inun mae betsa Betel namakis anu paniwan nia naman uta anu tsaua jatun chakabu pewanun ika beabu xanen ibukin Déboran jatu pepa yusinpaunikiaki. Ma janu tsaua beyani uinmixun kenakin: “Déboran paniwanki”, apaunibukiaki. <sup>6</sup>Xaba

betsatian Jehován ma tapinmaken Jacobun juni bake Neftalín enabu Abinóamnen juni bake Barac jawen mae Quedes anua jau junun Déboran juni betsa yunua kaxun yuitana ma juken Déboran Barac yuikin:

—Israelin enabu mekenika Dios Jehován eska mia yunuikiki, ea ninkawe, mia yuinunan: “Jacobun juni bake Neftalí inun Zabulón enabu xukuabu anua 10,000 detenamenikabu katuxun Mati Tabor anu jatube katanxanwen. <sup>7</sup>Mati Tabor dapi paxku Quisón napaku anuxun mia detekin achinun ika Canaán nawa xanen ibu Jabínen jawen detenamenikabu xanen ibu Sísara jatun caballo tadanti detenamenikabu jawen mapuabu inun jawen detenamenikabu main mapuabuyabi jau mianu benunbun en mia jatu meshui axanaii. Jakia matube detenameaibu man jatu maemaxanaii”, akin mikidi ea yuimashinaki— aka

<sup>8</sup>—Ea kaidan, min ebe kaya en mibe kaxanaii. Jakia min ebe kamaken en katidumaki— aka

<sup>9</sup>Déboran kemakin yuikin:

—Peki. En mibe kaxanaii. Man jatu maemaya mia kenwanbuma jakia jau detenun ainbu anu Sísara Jehován yunuxanikiaki. Deteken dasibibun ainbu betsa kenwanxankanikiki— aka Quedes anu Baracbe Débora ma buabun <sup>10</sup>jadixun jau benunbun Zabulón enabu inun Neftalín enabu anu jawen jancha Baracnen jatu buma ninkatan detenamenikabu bebidan bebidanaibu pewakin jatu ichawatan 10,000 detenamenikabube Mati Tabor anu Barac mapekeaya Déboradi jabe mapekeken

<sup>11</sup>Moisin ainen epa Hobabin enabu jawen kena betsa Quenita nawabu jawenabu betsa, jawen kena Héber jatu paxkabidanixun Saanaim anu ji ewapa kushipa dapi jatun tadi jiwe betsa betsapa ma puntenibu inikiaki, Quedes dapidan. <sup>12</sup>Mati Tabor Barac jawen detenamenikabube ma mapekeken Sísara banabimabu <sup>13</sup>ninkatan jatu detenun ixun jawen 900 hierro mane caballo tadanti mentsisipa mapubainabu inun jawen detenamenikabu main budiai mapekediaibun jatu ichawatan Haróset-goím anua jatu taxnimabaina xukudakabaini paxku Quisón napaku anu Sísaran jatu bichia <sup>14</sup>januxun Déboran Barac ana yunukin:

—¡Benikain ditanwen! Min Sísara detenun ikis Jehován mia maemamaikiki. Jatu medabewai min mentsisipa detenamenikabu bebun Jehová kaikiki— aka 10,000 junibube Mati Tabor anua Barac machi butebainaya <sup>15</sup>machatu chaipa kenujaidawen Balacnen detenamenikabu jatube detenamekin taewaibun Sísaran caballo tadanti mentsisipabu mapekebainaiu inun jawen main buaibu detenamenikabudi Jehován jatu mesewakin date paepa mistua jaska uintan jawen caballo tadantikia Sísara butui paxai kushikainaya <sup>16</sup>jawen caballo tadantikia detenamenika mapubainaiu inun jawen detenamenikabu paxaibu detenun ika jawenabubetan Baracnen jatu chibanbainkin jatun maewan Haróset-goím

anu jikipananbu Baracnen enabun jatu detekin keyukubainkin Sísaran detenamenikabu dasibi jatu tenan keyunibukiaki, tsua jiwemamadan.

<sup>17</sup>Canaán nawa Hasor anu xanen ibu Jabín Quenita nawabu Héberin enabube sinatanameismawen taea Sísara jadidi paxai kushikaini Héberin ain Jaelin tadi jiwe anu ma kemaya

<sup>18</sup>uintan inun ika jawen tadi jiwe anua taxnikidan Jaelin Sísara yuikin:

—Nedi judiwe, xanen ibuun. Nedi judiwe. Ewen dateama en jiwe anu jikiwe— aka jawen tadi jiwe anu jikia junekin mai bebekantiwen achimaya <sup>19</sup>Sísaran yukakin:

—En unpax manujaidaii. Ea unpax amawe— aka ina awa chuchu buspuai ma bunkashai chaxuwan bichi bishtuki adushinxun bixun bebekanti bepenxun amatan ana achimaya <sup>20</sup>Sísaran ana yuikin:

—Min jiwe xexekaian tsauxun ea uinxunwen. Tsuada juxun mia yukakin: “¿Min jiwe anu tsua juama ixumen?” mia akabu: “Tsua juamaki”, iwanan jatu yuixanwen— itan <sup>21</sup>jin ikidana punu nukatan uxa chakayamaken jawen tadi jiwe punteti ji kenujaidatan jawen mastakin jawen mestenwankin nexamisbu betsa bitan jawen mastatidi bixun Sísara anu unanxubida kakain jawa banawama ja dakanu mebaunkin jawen buxka unantan ji kenujaida Sísaran ishpuxku anu timaxun unanxubima jawen mastakin ji kenujaidawen buxka pesabain maiki seuwa Sísara jawaida mawaken <sup>22</sup>janua Baracnen Sísara benakubidani juaya jaki nukunun ika jawen tadi jiwe anua Jael taxnikain Barac yuikin:

—Nedi judiwe, ja min benai juaidan, en mia uinmaidan— aka Barac jikikain Sísara ma mawa ji kenujaida ishchankamea daka uintan <sup>23</sup>jawen detenamenikabu Israelin enabun detekin keyuabuwen taexun jau punu nukanun Canaán nawa xanen ibu Jabín Jehová datejaidamaya <sup>24</sup>jabiatiandi Israelin enabu ana kushipakubainkin Jabín inun jawenabu ichakawakubainkin atimas jawen mae mishkiwen kenebaunibu tekebain jawen maewanyanbis Canaán nawa xanen ibu Jabín tenankin yamawanibukiaki.

### **Eska Débora inun Barac kantanibukiaki, na janchadan**

**5** <sup>1</sup>Jabias xabatian Débora inun Abinóamnen juni bake Barac kantai eskanibukiaki:

<sup>2</sup>“Israelin enabu anu ana nukube detenamenun ika beaibun junibu man detenamenikabu nun matu kena ichapa jawa dateama jawaida yunu bedubidani man beshianbuwen taexun dasibibun Jehová kenwanankanwen.

<sup>3</sup>Yununikabuun, Jehová en kantaxunai ea ninkakanwen. Xanen ibu bexmasbuun, Israelin enabu mekenika Dios en kenwain ea ninkakanwen.

- 4 Jehovahán, mia bebunan, Seír anua taxnikidan ja Edomnen mai pakea anua min kainkainaya  
mai pacha sakuaya nai anua tuis tuis ikaya  
nai kuinen ui ichapajaida tuekin min imaniki.
- 5 Xanen ibuun, min juaya mati matipa mai pacha sakuaya  
Diosuun, Israelin enabu mekenika mia bebun Mati Sinaídi mai pacha sakuniki.
- 6 Anatin bake Samgar unanti wanikan jatu yusianyan Héberin ain  
Jael jiweyukun  
jabiatandi Israelin enabu main bukubaini  
bai jaxpa xabakabi anu jikiabuma  
bai jaxu chintun akeakekainawen datei june buaibun
- 7 datei mae pexeishta anu Israelin enabu jiwekatsi ikabuma  
jaskawen taea ea en Débora xanen ibui unanti wanikanun ika en taxnikaunimaki,  
Israelin enabu en jatun ewadan.
- 8 Yushibubu bena katutan nukunabun kenwainbu  
jabiatandi mae ewapa mishkiwen kenekauana jikiti xui anua detenameaibu  
jakia 40,000 Israelin enabu anu jashi bestichai inun jawen pia nemati mane bestichai tsua jayama ikimaki.
- 9 Israelin enabu xanen ibujaidabu jau nukuki sinataibube jatube detenamei benunbun en jatu kena  
jabun ea ninkatan bei ichashinabuwen taea eadan, en juinti jidabiwen en jatuwen benima chakayamaii.  
Jaskaken dasibibun Jehová kenwanankanwen.
- 10 Xanen ibu peiyabu asno juxupaki katsaumbainmisbu inun, tadi mai bebekanti pepajaida anu tsauabu inun,  
main bui jatun taewen mapumisbu Diosun kushipakidi jatu yuikubainkanwen.
- 11 Janu unpax biaibu anu mane mimawati chadun chadun amisbu anuxun  
jaska Jehovahán jatu maemashina inun  
jaska Israelin enabu mae pexepishtabia jatun xanen ibubun jawenabubetan  
Canaán nawabu detekin jatu maemashinakidi dasibi jatu banabimai chanikubaunkanwen.
- 12 Bestenwen. Déboraan, bestenwen.

- Bestentan jaska washinabukidi jatu kantaxunwen.  
 Abinóam juni bake Baracneen,  
 miadan, benikainkin detenamekin tsuabuda min jatu achishina jatu  
 iyuditanwen.
- 13 Januxun nawa kushipabube detenamenun ika  
 Israelin enabu ichapa manananua detenamenikabu butubidanaibun  
 nawa detenamemisbu maemanun ika  
 ewen taea Jehová detenamenika butubidanshinabuki.
- 14 Jacobun bake Efraínen enabu junibu jatitidun Barac medabewai  
 natukan napanpa anu butuaibun  
 jatu ichundi Jacobun bake Benjamín enabu detenamenikabu Barac  
 medabewai butudiabun  
 janua Josén baba Maquirin enabu xanen ibubu Barac medabewai  
 butudiaibun  
 januadi Jacobun bake Zabulónen enabu xanen ibu bexmasbu  
 Barac medabewai butudiaibun
- 15 ja dikabi Jacobun bake Isacarin enabu xanen ibubu Débora  
 banawabidani bekin  
 jawen detenamenikabu jabun medabewai Barac ichun kakin natukan  
 napanpa pukebainkin  
 Canaán nawabu jatu detei buaibun Jacobun bake iyua  
 Rubénen enabu anua xanen ibu betsabu juinti kushipa jayabiaken  
 jatukidi yuikin:
- 16 Chaxuwan mekenikabun jawen jiwe anuxun ina chaxu kena  
 ninkabidani bebiamicen  
 ¿jaskai nuku ninkatan beabumamen? ikaibun  
 jakia Rubénen enabu medanua xanen ibu betsabu  
 datediashinabukiaki.
- 17 Jene Jordán ukedi kexa betsa anu  
 Jacobun bake Galaadin enabu jiwea Barac medabewai beabumadiki.  
 Jatun xaxu ewapa chaipa anu Jacobun bake Danen enabu  
 jatun xaxuwen besti nui bashikua  
 Barac medabewai buabumadiki.  
 Ianenwan anu janu xaxu keti amisbu anu  
 Jacobun bake Aserin enabu ianenwan kexa anua Barac  
 medabewanun ika  
 jawa e ibaunama bashikua buabumadiki.
- 18 Jakia Jacobun bake Zabulónen enabu inun jawen bake Neftalín  
 enabu debutidubu shinain  
 mesejaidabiai Canaán nawabu mananan jiweabube detenamekin  
 Barac medabewashinabuki.

- 19 Janua Taanac anu xanen ibubu jawen detenamenikabube bei  
mae betsa Meguido jatun chacha unpax betsa betsapa dapikexun  
jatu detetan jatun mabu binun ikaibun  
Canaán nawa xanen ibubu bea detenametan  
jatun plata pei jexe inun mabu pepa binun ika bebia jawa biama  
benushinabuki.
- 20 Nai anua bishin jawen bai tanabidankin  
Sísara nemakin bishi chaxa kushipawen jawenabu deteaibun
- 21 Paxku Quisónen detenamenikabu dasibi jatu tsispubainkin  
kushibainkin bukin jatu yamawashinaki.  
¡Jatu jaska washinken jawa punu nukai chintuanma  
ikubainankanwen!
- 22 Detenamenika kushipabu caballoki katsaumea  
caballo tae badux badux ibidani kushibidanbidanaibun
- 23 Jehován nai tsuman jatu yuikin:  
‘Mae Meroz inun janu jiweabu chakabujaidabuki.  
Israelin enabu jawa dateama detenameaibu Jehován jatu  
medabewaya  
Meroz anu jiweabu ichabidan jatube detenamekin  
Israel medabewai beama ishianbuwen taexun Jehován jatu yupua  
jau nuitapa chakayamaxanunbunwen’, akin Jehován nai tsuma  
kushipajaidatun jatu banabimakubaunshinaki.
- 24-27 Unpax Sísaran yuka ina awa chuchu inankin  
mane kenchá jawenduaki chuchu pepa Jaelin amatan  
jaska wamatan meken yusmaudiwen ji kenujaida bitan tsumatan  
jawen meken yusiudiawendi jawen dayakin mastamisbu tsumatan  
ji kenujaida Sísaran ishpuxkuki timabain unanxubima mastakin  
jawen buxka pesabain maiki seuwa  
jawaida uxayastan Jaelin tae dapi mawai Sísara dabekeakeaketan  
janu daka mawashinawen taexun  
ja Quenita nawa ainbu Héberin ain Jaelin ainbu betsa betsapabu  
jatu binua pepaki.  
Jael ainbu betsabu binumakin Jehován jau duawakubainunwen,  
nukun tadi jiwe anu jiwebaunabu ainbuaibu jatu binua  
pepajaidadan.
- 28 Jaskaitian jawen ewan jawen bake Sísara benai jawen nui: ‘¿Jani  
juimenkain?’ ikin uinti xui anu texunxun uin yuka ikin:  
‘¿Jaskai yane jawen caballo tadanti juama nishmaimenkain? ¿Jaskai  
jawen detenameti caballo tadantiya yane juamamen?’ ikaya

29-30 ainbuaibu betsa unanepatun kemakin jabiaska jawen ewan shinain keskadi yuikin:

‘En ean unanan, jatu detekin keyutan jawada pepa jatu biankin tsisputan ma jatu paxkaxunkanikiki.

Ja detenamenika tibitun ainbu bikin dayadu jatu wakin bestichai inun dabe jatu bibainbainkanikiki.

Jamen Sí saran jatu biankinan, jatun bachi jua juaya kepananyan tashipa betsa betsapaya bikiki, ja maemanika teyabukukatsidan’, ishianki.

31 Jehováan, dasibi miki sinataibudan, jau jaskai mawai keyukubainunbunwen.

Jakia mia bechipaiaibudan, badi kushipakin chaxa wakin keyumis keskai jau chaxajaidaxanunbunwen”, iki

Débora inun Barac kantanibukiaki.

Jatu jaska waxunima jabiatandi ja mai pakea anu 40 año kai Israelin enabu unanuma jiwekubainibukiaki.

### Jehováan Gedeón katukin kenanikiaki, na janchadan

**6** <sup>1</sup>Ja 40 año keyukainaya jaska Jehováan jatu nemani keska jiwekin akama jatu uianmaya keska Israelin enabun ana chakabukubainai buwen taexun Madián nawabun 7 año Israelin enabu jau jatu ichakawakubainxanunbun Jehováan jatu yunukin jeneimaken <sup>2</sup>jatu ichakawakubainkin pikukubainaya Israelin enabu Madián nawabuwen datei mati tenanman inun, maxax tanpe medan inun, janu tsua katiduma bikajaida anu janu juneti waima jadi junea Israelin enabu jiwekubainkin <sup>3</sup>janu jatun yunu banaibu tibitian Israelin enabun bai waxun yunu banaimabu ma jushin kaniaya Madián nawabu inun Amalec nawabu inun nawa betsa badi juaikidia bexun yumetsukin jatu detenun ika bebidan bebidanpaunibukiaki. <sup>4</sup>Israelin enabu mai pakea tibi anu jatun tadi jiwe puntetan yunu banakubidanaibu jatu yumetsukin jatu keyunkubidankin Gaza anu jatu jenenkin Israelin enabun ana jawa pitidubumawakin jatun chaxuwan inun jatun ina awa inun jatun asnodi jawenchains yumetsukin jatun piti yamawapaunibukiaki. <sup>5</sup>Jatu piankin biankubainun ika shini midimajaida bea keskai jatun tadi jiwe inun, jatun inabu inun, jatun camello midimajaida tsuan tanatidubuma iwekin jatun piti yumetsuxun jatu pimakin bai dasibi chakabuwakin jatu texe jenexunama ipaunibukiaki. <sup>6</sup>Madián nawabun jatu ichakawaibuwen taea Israelin enabu nuitapa chakayamakubainkin atimas shinanbaun Jehová medabe yukakin:

<sup>7</sup>“Madián nawabu nemaxunkin nuku medabewawe”, akin Israelin enabun Jehová ea akabu <sup>8</sup>jaska wabu jatu ninkatan Jehováan jawen

jancha yuixunika jatunabu betsa jatu anu yunua taxnitan ja Jehován jancha yuixunikan jatu yuikin: “Eska matun xenipabu Israelin mekenika Dios Jehován matu yuiai matu yuinun ea ninkakanwen: ‘Egipto anuxun matun xenipabu dayadu wakin tsuma wanibu jiwekubainaibu paxawakin en jatu taxnimabidaniki. <sup>9</sup>Egipto anua en jatu mebin bestiama jakia jatu ichakawaibu nemakin en jatu maemaxundianiki. <sup>10</sup>Matun ibubu yuikin: Matun mekenika Dios Jehovádan, en ea bestiki. Janu man jiwexanai anu Amorreo nawabun yushibu betsa betsapabuwun dateyamaxankanwen, akin matun ibubu en jatu yuibianiken na jabia mai anu jiwexun man jatun bakebun man ea ninkakatsi ismaki’, akin jawen jancha yuixunikan jatu yuinikiaki.”

<sup>11</sup>Janua mae betsa Ofrá anu juni betsa Abiézerin enabu Joás ika anu Jehován nai tsuma kushipa taxnia ji ewapa kushipa naman tsaua jabanudi janu jaki vino wanun ixun uva bimi pema pema akin jawen jene shudu shudu amisbu anudan, jau Madián nawabun uinyamanunbun junetan Joásin juni bake Gedeónen ja mesti xekiwan tsekakin maiki kusha kusha akin xemeaya

<sup>12</sup>Jhován nai tsuma kushipatuun jawen yuda Gedeón uinmakin yuikin:

—¡Juni mesema kushipatuun, Jehovádan, mibeki!— aka

<sup>13</sup>Gedeónen kemakin yuikin:

—Xanen ibuun, eki sinatayamawe. Jakia eadan, en jaskamaki. Jehován nuku medabewaya jaskakin nuku ichakawakanimenkain, Egipto anua Jehován nukun xenipabu paxawabidani nuku yuimisbu inun jawen kushipa unanmati dami betsa betsapa uinkubidanixun nuku yuikin jancha wamisbudan, ¿ikis janimen? Jehován nuku ma jenebainimaxun Madián nawabu nuku yunuima nuku ichakawakanikiki— aka

<sup>14</sup>beiskin Jehován yuikin:

—Minabu Israelin enabu medabewakin Madián nawabun kushipa mebinkin jaska min kushipa jayawen jatu medabewadiwe, ean en mia yunukin nichiaiwun taexunan— aka <sup>15</sup>Gedeónen ana kemakin yuikin:

—Xanen ibuun, ana eki sinatayamawe. Jacobun bake Manasésin enabu medan enabus jiwebaunabu jawa jayabuma inun en epan juni bakebudan, en jatun betsa maxkuki, dayadu keskadan. ¿Jaskatan Israelin enabu en jatu medabewatidumen?— aka

<sup>16</sup>Jhován ana kemakin yuikin:

—En mia medabewakubainaiwen taexun juni bestichai maema keska wakin Madián nawabu dasibi min jatu maemaxanaii, matun maiwan pakea anua jatu nichinkinan— aka

<sup>17</sup>januxun Gedeónen ana yuikin:

—Min ea bechipaiaidan, ea uinma kayabiwe. Jaska jabia min Jehová ebe janchai ikimenkainan, ea xabakabi unanti wamakin jawen unanmati dami ea waxunwen— itan <sup>18</sup>—Jawada mia inankuinkatsi en mia bixuin kai en chintunkidanai na jabanuxun ea manayuwe— aka

Jehován kemakin yuikin:

—Peki. Nenu jabianuxun en mia manayuui— aka

<sup>19</sup>Gedeón kaxun cabra bake babupa tesenxun dashpetan bais bais axun pichan baya 20 litro xekiwan dudu pepa tanaxun jawen xaxa watiuma misi ichapa watan januxun nami chichanki nexetan jawen jene kentiki manekin juxketan misiyabi dasibi ji ewapa kushipa naman buxun <sup>20</sup>Diosun nai tsuma kushipatun yunukin yuikin:

—Ja mishki anu nami inun misi xaxa watiuma manchinxun jawen jene maxu awe— aka jaska yunua keska wakin Gedeónen axuan <sup>21</sup>Jehován nai tsuma kushipatun ja nami inun misi mishki mamaki manchinxuna jawen mestenti jawendua debuwen timaya ja mishki anua chi jede ji ikin menukin keyuaya janua Jehován nai tsuma kushipatun jawen yuda junei inakainaya <sup>22</sup>jaska Jehován nai tsuma kushipatun ma axuan Gedeónen uintan datekin yuikin:

—¡Yuu! Jehováan, min nai tsuma kushipabe beisinanamekin en uinxuki, mawamadan— aka

<sup>23</sup>Jehován kemakin yuikin:

—Dateyamawe, min mawamakidan. Ewen taea unanuma jiwekunkainwen— aka

<sup>24</sup>januxun Gedeónen kenwanti chi tapu Jehová bena waxuntan kenakin: “Jehovádan, nukun unanumaki”, anikiaki. Abiézerin enabun mae Ofrá anu ja kenwanti chi tapu natian uintidubu jayaki.

<sup>25</sup>Chipu jabias meshu medan Jehován Gedeón ana yuikin:

—Min epan ina awa mapua anua jawen ina awa bene ja kachu kaini 7 año jaya katutanwen. Jaska watan Baal kenwanti chi tapu min epa jaya tekekin di atanwen. Ja dikabi Baal chi tapu dapi ji dami kenwanmisbudi nia dedakin di adiatanwen. <sup>26</sup>Jaska watan min mae kenekauana dapi mati pishta anuxun min mekenika Dios Jehová kenwanti chi tapu bena wawe. Jaska wakin pewakin keyutan ina awa bene katuxun min ma bitana tesentan Baal ji dami min dedaxu ja kadu watan ja kaduwen ina awa bene ea menuxunkin keyuxunwen— aka

<sup>27</sup>jaska Jehován yunua anun ika badidi akama jawen epan enabu inun jawen mae anu junibuki datekin meshu medan jawen dayadubu 10 iyuxun jaska Jehován yunuxu keska axunkin dasibi jatubetan Gedeónen ashianyan <sup>28</sup>penama bestenbaun Baal kenwanti chi tapu di ika inun Baal ji dami deda yudabun uinkin ja dikabi chi tapu bena waxun ina awa tsuabunda menukin keyushinaibu uindiai

<sup>29</sup>yuka ikeakei: “¿Tsuan nuku jaska wanmen?” ikin benai yuda tibibube yuka ibaunkin atimas Gedeónen ashiaian ninkakin tapinbain jawen jiwe anu buxun jawen epa Joás yuikin:

<sup>30</sup>—Min bake nedi kainmawe. Baal kenwanti chi tapu tekekin di atan ja Baal dami chi tapu dapi nia ma dedawen taexun nun tenain jau mawanunwen— akabu

<sup>31</sup>Jakia bea mapubaunabu nemakin Joásin jatu yuikin:

—¿Yushibu Baal yaushi man detenaxuniyuamen? ¿Man medabewai daka ikai? Ja Baal chanima Diosken tsuabunda Baal detenaxunaidan, penadiama ibubis tenanmeikiki. Baal jaska Diosmenkain, jamebi jau jatu tenanunan, jenekanwen— jatu wanikiaki.

<sup>32</sup>Joásin yuikin: “Ja Baal Dios kayabidan, jau jamebi nemakin detenunwen”, ixunwen taexun Gedeón kena bena wakín: “Jerubaalki”, anibukiaki, nukun janchawenan, “Baal Nemanikadan”, jatun Baal chi tapu teke keyushinawen taexunan.

<sup>33</sup>Janua ana badi betsatian jatun piti pianun ika Madián nawa dasibibu inun Amalec nawabu inun badi juaikidia nawa betsa jiweabudi jusi janus ichai keyutan Jene Jordán pukebidan napanpa betsa Jezreel anu jatun tadi jiwe midima puntebaunabun <sup>34</sup>januxun Jehován Yushinen Gedeón kushipa wakín achiawen taexun jawenabu Abiézerin enabu jau jaki ichai benunbun chaxuwan maxun pudi atiwen jatu chan chan akin <sup>35</sup>Manasésin enabu dasibi jau yuixuntanunbun juni betsabu yunua buxun jatu yuikubaunabu ninkatan Gedeón anu bei ichaibun ja dikabi Aserin enabu inun Zabulónen enabu inun Neftalín enabu jau yuidiaxunbauntanunbun juni betsabudi Gedeónen jatu yunua buxun jatu yuidiabaunabu ninkatan Gedeón anu bea ichai keyuabun

<sup>36</sup>januxun Dioskidi shinanbiai date duakabikin Gedeónen Dios yuikin:

—Jaska min ea chanima yunukin Israelin enabu medabewamakin mekemaimenkain min ea yunushina keska akatsi <sup>37</sup>ja dukun en mia unanti waii. Mananxun januxun xekiwan katamisbu anuxun chaxuwan bichi daniya ma badi kaya en datain kaii. Januxun penama kaxun nibiwen jawen dani besti mechaken janua mai mechama uintan min ea Madián nawabu maemamakin Israelin enabu min ea jatu mekemaxanai jaska min ea yuishina en ikunwanxanai— aka

<sup>38</sup>jaska Gedeónen yubashina Jehován axuan penama Gedeón bestenkaini kaxun mai tsusin inun chaxuwan bichi jawen dani besti mecha uintan bixun ja bichi jawen daniki nibi mata kenchaki tsinikin ja jene kenchata matawanikiaki. <sup>39</sup>Jaska waxunbia Gedeónen ana Jehová jancha wakín yuikin: “En mia ana ea akai eki sinatayamawe, jaska unanmati betsa en ana uinkatsis ikin en mia ana besti wakín yukaidan. Badi kaya chaxuwan bichi daniya en ana datanken ana penama jawen dani besti tsusin inun mai besti nibipan mecha wa en uinkatsis ikaii. Jaska uintan min jancha en ikunjaidawatiduki”, aka

<sup>40</sup>jaska Gedeónen ana Jehová yukaxu meshu medan uinmakin Jehován ana axuan penama bestenkain Gedeónen chaxuwan dani mechama janua mai besti mecha Gedeónen uinikiaki.

**Gedeónen jawenabubetan Madián nawabu jatu  
detekin keyunikiaki, na janchadan**

**7** <sup>1</sup>Gedeón, jawen kena betsa Jerubaal inun dasibi jaki ichashinabu ma pena kemaya bestentan bui chacha unpax jawen kena Harod dapi jatun tadi jiwe puntebaunabun janua Madián nawabu ikidan, nortekidi Mati Moré tenanman napanpa anu jatun tadi jiwe puntebaunimabun

<sup>2</sup>januxun Jehován Gedeón yuikin: “Juni ichapajaidabu min jatu iweshinaki. Madián nawabu en jatu detekin keyumaya: ‘Nukun kushipawen nun jatu detekin keyuxuki’, iki ea kenwanma ibubis kentidubuki. <sup>3</sup>Jaskatidubuken ja junibu eska jatu yuiwe: ‘Tsuabuda man dateaidan, matun jiwe anu budikanwen’, jatu wawe”, aka jaska yunuxu keska Gedeónen jatu yuikin unanti wa janua 22,000 junibu chintunbainabun 10,000 junibu besti bashikui niti ikabun <sup>4</sup>jaska jatida bechipaiama Jehován ana Gedeón yuikin: “Na juni ichapajaida jayayuabuki. Jau unpax anunbun jatu iyuwe. Jadixun mia jatu unanti waxunkin tsuabuda mibe buaibu inun mibe buabuma en mia unanmai kii”, aka

<sup>5</sup>unpax amakin jene anu Gedeón jatu iyua Jehován ana yuikin: “Jabun unpax akin jatun mekenen beatan kamanen amis keska wakin taxu taxu akaibu inun jabu danti itan denikain akaibu jatu paxkawe”, aka

<sup>6</sup>jau unpax anunbun Gedeónen jatu yunua unpax akin 300 junibun mekenen beatan akin taxu taxu akaibun janua jatidibu danti ixun unpax akaibun <sup>7</sup>jaska waibuwen taexun Jehován Gedeón ana yuikin: “Na 300 junibuwen en matu mekexanaii, Madián nawabu maemakin keyukinan. Ja jatidibudan, jatun mae anu jau chintundibaintanunbun jatu yunuwe”, aka

<sup>8</sup>jatun mae anu jau chintundibainunbun jatu yunutan jabatiandi Gedeónen jatu yuikin jatun shumu ichapa inun jatun chaxuwan maxun pudi ati jatu yuka jaki yaushiana inanbu bitan Gedeónen jatu nichian buabun ja 300 junibu ma jatu katukin bashia napanpa manankidi maniabu jakia Madián nawabu napanpa anu jiweabun

<sup>9</sup>jabias meshu medan Jehován Gedeón yunukin yuikin: “Beniwe. En mia jatu maemamaiwen taexun Madián nawabu anu jatu detei bukanwen. <sup>10</sup>Jakia jatube detenamei min dateaidan, min dayadu Purábe ja dukun jatun tadi jiwe puntebaunabu dapi kaxun <sup>11</sup>jaska janchaibu junexun ninkatanwen. Jaska janchaibu jatu ninkatan jatu detenun ika min janu shinan chankanxanaii”, aka

ninkatan Madián nawa janu kesubaunabu dapi jawen dayadu Purábe Gedeón kakunkainaya <sup>12</sup>janu Madián nawabu inun, Amalec nawabu inun, nawa betsa badi juaikidia beshian pabaunkin napanpa jidabi

keyubia maninibukiaki, shini midima keska maniabu inun jatun camello midimaya ianenwan kexa mashiti tsuan tanatiduma keskadan. <sup>13</sup>Madián nawabun tadi jiwe puntebauna dapi kemaxun Gedeón ninkatushiaya uxa namakidan bestenxun detenamenikan jawen jaibu yuikin:

“Uxa namakinan, eska en uinxuki. Xekiwan betsa misi tudu ewapa tadamekidankin nukun tadi jiwe puntebaunabu anu tadi jiwe bestichaiki jaki teakin tatu aka kai di ikai en uinxuki”, aka

<sup>14</sup>jawen jaibun kemakin yuikin: “Ja min namaxudan, jawa betsa min uinxu dabanen min ikai. Jakia Israelin enabu Joásin bake Gedeónen deteti machatu chaipa kenujaidaki. Madián nawabu inun dasibi jatube jiweabu Diosun Gedeón jatu achimaken nuku detekin keyutidubuki”, aka

<sup>15</sup>jaska namakidan bestentan jawen nama jawen jaibu yuia ninkatan Gedeónen Jehová kenwantan jawenabu Israelin enabu anu chintunkain jatu yunukin yuikin: “Madián nawabu dasibi Jehován nuku jatu maemamaikiki. ¡Ibaunankanwen!” jatu watan

<sup>16</sup>jawen 300 junibu paxkakin xuku dabe inun besti jatu watan juni tibi chaxuwan maxun pudi ati inun shumu xaka Gedeónen jatu inan dasibibun shumu medan bin dekutan junexun buaibun <sup>17</sup>Gedeónen ana jatu yuikin:

—Madián nawabun janu jatun tadi jiwe puntebaunabu kexa betsaudi en binui kaya yusiudi inun yusmaudi xuku dabe bukanwen. Jaudi jikitan ma en binu pewaken jabias en ikai keskadiai matundi ea mawai jabiaskadi abaunkanwen. <sup>18</sup>Ea inun en jatube kaibetan chaxuwan maxun pudi ati chaan chaan nun akaya jabiaskadi matundi adiatankanwen. Jancha kushipawen yuikin: “¡Jehová inun Gedeónwen nun maemaii!” ixankanwen— jatu wa

<sup>19</sup>100 junibu xuku betsa Gedeónbe bui tadi jiwe puntebaunabu kexa betsa ukedi ikabu detenamenikabu jatun jatu uinxunai betsa yamenapun maeaya Gedeónen jatubetan chaan chaan akin shumu tsumabainabu pusatan jatun bin chaxawakin taewaibun <sup>20</sup>januxun ja xuku dabetundi jatu ninkatan jatun chaxuwan maxun janus pudi akin chaan chaan akin shumu tsumabainabu pusadiatan jatun bin chaxawadiakin dasibibun meken yusmaudiawen bin chaxai sanankin meken yusiudi chaxuwan maxun pudi ati bukin jui kushipawen sai ikin: “¡Jehová inun Gedeónwen nun detenameaii!” ikaibun <sup>21</sup>Israelin enabu jatu kexeabauna pes mapuxun manaibun Madián nawa detenamenikabu dasibi bestentan sai sai iki datei paxaibun <sup>22</sup>jabiatiandi 300 Israelin enabun chaxuwan maxun pudi ati chaan chaan akin jeneabumaken Madián nawabu Jehován jatu janubi detenamemaya jabu paxai Bet-sitá unu mae betsakidi bui Sererá baikidi bui maiwan pakea Abel-meholá dapi anu mae betsa Tabat dapi buaibun

<sup>23</sup>Israelin bakebu Neftalín enabu inun Aserin enabu inun Manasésin enabu dasibibu Gedeónen jatu yunukin jau Madián nawabu chibanbain detenunbun <sup>24</sup>juni betsa betsapa Gedeónen jawen jancha jatu bumakin Jacobun bake Efraínen

enabu maiwan pakea mati matipa mae tibi anu jatu yunukin: “Madián nawabu detei butubaintankanwen. Janu pukei buaibu bebunkidi Bet-bará anu kexekin inun Jene Jordán dasibi anu pukebaindiatidubu tibi kexekanwen”, jatu wa jaska Gedeónen jatu yunua bukubaunkin jatu yuikubaunabu ninkatan anibukiaki. <sup>25</sup>Jatunabu detekubainkin Madián nawa xanen ibujaida dabe jatun kena Oreb inun Zeebdan, Oreb achikiran, mishki kedan kedanja dapixun achitan tenanibukiaki. Natian ja mishki kedan kedanja nun unainan: “Orebin Mishki Kedan Kedanja”, amisbuki. Jamen xanen ibu Zeeb achixun tenankinan, januxun uva tsinikin vino wamisbu anuxun ja mae anuxun anibukiaki. Jabun Madián nawabu chibankubainkin detetankin chintunbidankin Orebin buxka inun Zeebin buxka textebainkin bukin Jene Jordán ukedi Gedeón anu buxunibukiaki.

\*\*\*\*\*

### Jaskatan Gedeón mawanikiaki, na janchadan

**8** <sup>28</sup>Jaska wakin Israelin enabun ana jatu ichakawatimawakin bextejaidaimabuwen taea Madián nawabun ana jatu meama pe jiwekin ana jatu yumetsuin beabumaken 40 año kaya Gedeón jiweyuken Israelin enabu maiwan pakea anu unanuma jiwekubainibukiaki.

<sup>29-30</sup>Jabiatiandi Gedeón, jawen kena betsa Jerubaal jawen mae anu chintunkaini pe jiwekunkainkin ainbu ichapa jatu ainwankubainkin 70 juni bakebu jatu bawakubainkin <sup>31</sup>januxun Siquem anua dayadu wakin ainbu peiwen bimaxun jadia janubi uintantankin jaki juni bake waima kainxuna kenakin: “Abimélecki”, anikiaki.

<sup>32</sup>Janua Joásin bake Gedeón anibui mestebujaidatan mawaken Abiézerin enabun mae Ofrá anu janu jawen epa Joás maiwanibu anu Gedeón buxun maiwadianibukiaki.

<sup>33</sup>Gedeón ma mawaimaken Israelin enabun Diosun jancha ninkakin ana bechipaiama chintuntan yushibu Baal dami betsa betsapa kenwanun ixun jatun mekenika wakin Baal-berit Israelin enabun katunibukiaki.

<sup>34</sup>Jatuki sinatai jatu dapi jiwebaunabun jatu ichakawaibu jatu medabewakin jatun mekenika Dios Jehován jatu maemaxuni shinanma jakimanibukiaki. <sup>35</sup>Ja dikabi Gedeónen jatu medabejaida wabiani ana shinanma Gedeónen enabu Israelin enabu betsabun jatu pe duawakin medabewama idianibukiaki.

\*\*\*\*\*

### Sansón kainxanaikidi nai tsuma kushipatun jawen ibu yuinikiaki, na janchadan

**13** <sup>1</sup>Jhován jatu uinbia jaska shinanma Israelin enabun chakabuwaibuwen taexun 40 año kaya Israelin enabu jau jabun jatu ichakawakubainxanunbun Filisteo nawabu Jehován jatu yunutan ana jatu nemaxunamakan

<sup>2</sup>Jabiatiandi Jacobun bake Dan enabun maiwan pakea anu mae betsa Sorá anu juni betsa jawen kena Manoa jiwea, jawen ainin jaskatan bake bitidumajaida jiweken <sup>3</sup>janua Jehováan nai tsuma kushipa ja ainbu anu taxnixun yuikin: “Min bake bitidumabia natian min bake nanexanaii. Ja bake min biaidan, juni bake min kainxanaii. <sup>4</sup>Eskaxunkunkainxanwen. Vino inun jamapai nuxuti betsa paepa ana jamamaki ayamakubainxanwen. Ja inun, Diosun matu nemani ja pitima pidiayamakubainxanwen. <sup>5</sup>Min bake bitan kainxanaii. Min bake kaindiama medibi Diosuna ixanikiki, Nazareodan. Jaskawen taexun ja min bake kaian jawen bu mextetimaki. Janua ewai kushipakin Filisteo nawabun man Israelin enabu matu ichakawakubainaibu jatun matu medabewakin taewaxanikiki”, atan kaken

<sup>6</sup>jaska wawana ainbu kaxun jawen bene yuikin:

“Dios anua juni betsa en nia anu taxnitushikin ea datea en juxuki. Jehováan nai tsuma kushipa daki en uinxuki. Yukakin: ‘¿Min tsuamen?’ akin en yukama ixuki. Jatundi ea jaskadi ea yukama idiaxuki. <sup>7</sup>Jatun ea yuikin: ‘Juni bake bitan min kainxanaii’, ea waxuki. Jawen taexunkiaki ana vino inun jamapai nuxuti betsa paepa natian en ana atidumakiaki. Ja inun, jawada Diosun nuku nemani ja piti pitima en ana pitidumakiaki. Ja en bake kaindiama inun janu mawaxanaitianan, medibi Diosuna Nazareo ipakexanikiaki. Jaska ea yuixuki”, aka

<sup>8</sup>ninkatan janua Manoa Jehovábe janchakin: “Jehováan, en mia yukaii, ja juni iwanxu ana nuku anu yunuwe, ja bake kainxanaikidi nuku ana yuikin jau nuku mextanmayununan”, aka

<sup>9</sup>jaska Manoaan ea aka ninkatan Jehováan axunkin jawen nai tsuma kushipa ana yunukin nichinxuna bai anu ana ainbu dayai kaki ana jaki nukui taxnia uintan jawen bene Manoa janumaken <sup>10</sup>janua ainbu jawaida kushikain jawen bene yuikin:

—Baa, ea ninkawe. Uatian juni eki nukushinadan, ua ma ana juaki. Ebe kaxun uin kawe— aka

<sup>11</sup>Manoa benitan jawen ainbe kai juni juaki nukutan yukakin yuikin:

—¿Min miamen, uatian en ainbe min janchashinadan?— aka

ja junin kemakin yuikin:

—Jaa, en eaki— aka

<sup>12</sup>januxun Manoaan ana yukakin:

—¿Jaska min yuishina nukun bake kainxanai jaska waxun nun yume watidumen? ¿Nun jaska wakubainxanai?— aka

<sup>13</sup>Jehováan nai tsuma kushipatun kemakin yuikin:

—Jaska dasibi min ain en ma yuishina keska ixunkin jau akubainunwen.

<sup>14</sup>Uva bimi jene paediaman inun vino inun nuxuti buspui paeai jau ataskayamaxanunwen. Ja dikabi jawada Diosun matu nemani nami betsa betsapa min baken pidiatidumaki. Jaska min ain en yunushinaki— aka

15-16 ja juni Jehován nai tsuma kushipa unanma Manohan ana yuikin:

—Mia benimawakin cabra bake nami babupa detekin tesenxun nun mia bawaxuni kai, jabianu bashikuxun piyuwe— aka

jaska wa Jehován nai tsuma kushipatun kemakin yuikin:

—En bashikutiduki. Jakia mibetan en pitidumaki. Jakia Jehová kenwankin benimawakin cabra bake tesenxun min menukin keyuxuntiduki— aka

17 januxun Manohan ana nai tsuma kushipa yukakin yuikin:

—Jaska min nuku yuishina keska nukun bake ma kaiyanan jawen taexun nun mia kenwanxanun min kena besti nuku yuiwe— aka

18 nai tsuma kushipatun kemakin:

—¿En kena jaskakin man unankatsis ikai? En kenadan, juneyua pepa jawenduajaidaki. En matu yuitidumaki— aka

19 Jehová kenwanun ixun kadu bixun mishki mamaki kadu pewakin manchinxun cabra bake tesenxun misiyabi manchintan chi keti waxun nami inun xeki bedu menuabu jede ji ikai bebun Manoha inun jawen ainen uiainbun jaska tsuan atiduma jawen dateti dami Jehován jatu uinma 20 chi jede ji ikai anu jawen kuin inai puebainai anu Jehován nai tsuma kushipa ja chi jede namakis nai anu inakainai uintan datei danti iki beti itan

21-23 —Ja junidan, Jehován nai tsuma kushipaki— ixun

atimas unantan Manohan jawen ain yuikin:

—Dios nun uinxuwen taea jawa teama chanima nun mawaii— aka jakia jawen ainen kemakin yuikin:

—Nuku tenankatsi ikinan, cabra bake nun menukin keyuxuna biama ikeanxuki. Chi kuin anudi juni inakainai nuku uinmama ikeanxuki. Juni bake en jayaxanai nuku yuiama idiakeanxuki. Jaskawen taexun nuku kupikin debu wamaki— aka Manoha inun jawen ain uinmai ja Jehován nai tsuma kushipa ana jatu anu taxniama inikiaki.

24 Jaska waima jiweatian Manohan ainin bake bi tuyatan juni bake kaian kenakin: “Sansónki”, akimabu Jehován duawakin pepa wakubainaya jatun bake ewai ma yumeken 25 xaba betsatian mae betsa Sorá inun mae betsa Estaol namakis Jacobun bake Danen enabube Sansón jiweyuken januxun Jehován Yushinen Sansón achitan kushipa wakin taewaya

### Sansónen ainbu binikiaki, na janchadan

**14** 1 jawen mae manananua kainkaini machi butebaini Filisteo nawabu maiwan pakea anu mae betsa Timná anu jikixun Filisteo nawa ainbu chipash jawendua uintan 2 chintunkaini jawen jiwe anu kaxun jawen ibubu yuikin:

—Timná anu kaxun Filisteo nawa ainbu chipash en uinshinaki. Dasibi pewakin jawen ibubube ea janchaxuntankanwen, ja ainbu en ainwankatsis ikaidan— jatu wa

<sup>3</sup>Jakia jawen ibubun kemakin yuikin:

—Filisteo nawabu tsuan Dios kenwanbuma anua ¿jaskakin ainbu binun ika min ikai? ¿Min betsabu ainbu bake jayamamen? ¿Nukunabu Israelin enabu dasibi anudan, ainbu bake jayabumamen?— akabu

Sansónen jawen ibubu kemakin yuikin:

—Ja ainbu chipash en bechipajaidai ikai ea jaska wama ja ainbun ea yuka iki pexuntankanwen— jatu wa

<sup>4</sup>ainbu Jehován Sansón bechipaimashina jawen ibubun unanma inibukiaki. Jakia ja Filisteo nawabun año tibi Israelin enabu yunukin jatu ichakawakubainaibu jawen bepadantan jatu medabewakin detexunkatsis ikin Sansón Filisteo nawabu anu Jehován yununikiaki. <sup>5</sup>Jaskaken Timná anu kanun ika jawen ibubu bebuaibun chipu Sansón kai Timná anu jiweabun uva bimi mishki bai kenekauna anu jikikain león yume bena kushipa tekeden tekeden ikin Sansón achinun ika kushikidan jaki ishchuaya <sup>6</sup>Jhován yushinin Sansón kushipawa jawen meken anu jawa tsumamabia león achixun jawen pabu tibi tseka tseka akin tenankin cabra bake pishta akawa janua ana kai Timná anu jawen ibubuki nukutan león detebidanxukidi jawa jatu yuiama <sup>7</sup>janua jawen jiwe anu kaxun ja ainbu chipash bechipajaidaki nukuxun yuikin:

—Mia bechipaikin en mia ainwankatsis ikaii— aka ainbun kemakin yuikin:

—Peki. En mia benewatiduki— aka Sansón inun kaken

<sup>8</sup>chipu xaba eskadabes kaya ainbu bitanun ika ana Timná anu chintunkidankin león tenanshina uintanun ika baima jikikain león yuda medanua samun buna jawen bataya bechixun <sup>9</sup>ja buna mapukia jawen bata mekenen dashpekin bitan jawen bata pibaini baiwen ana kai janua jawen ibubuki nukuxun buna bata jatu inan akaibun león mawashina anua bixu jawa jatu yuiama kaya

<sup>10</sup>janua chipashan jiwetan Sansónen epa janchai kaken Filisteo nawabun beyawen taea jatu beyusmakin jatube bedenambu ichawaxun jatu benimawakin taewaya <sup>11</sup>uinxun Sansónbe jau beyusnunbun jawen datekin Filisteo nawa juni ewabun 30 bedunanbu katuxun yunuabu <sup>12</sup>ja 30 bedunanbu Sansónen jatu yuikin:

—Junea unanmati jancha en matu yuiyai jawamenkain ea yuixankanwen. 7 día nun beyusi keyudiana jawamenkain xabakabi man ea yuia tadi manyunepa juxupa dasibi sawetiya inun jaya beyusti tadi dasibi matu tibi en matu inanxanaii. <sup>13</sup>Jakia xabakabi man ea yuiama jabiaskadi matuna matu tibitun man ea inandiaxanaii— jatu wa

bedunanbun Sansón kemakin yuikin:

—Jaska min nuku yuixu peki. Min junea unanmati jancha nuku yuidiwe. Ninkaxun xabakabi unantan nun mia yuitiduki— akabu

<sup>14</sup>jaska wabu jawen junea unanmati jancha Sansónen jatu yuikin:

“Tsuada pianan anua jawen pia ana taxnishinaki.

Ja kushipajaida anuadan, batajaida taxnidiashinaki”,  
jatu washina xaba dabe inun besti binukainaya “¿Jawamenkain?” ixun  
yuitidubumawen taexun <sup>15</sup>ana xaba betsatian Sansónen ain yuikin:

—“Jawen junea unanmati jawamenkain”, nun unanmaki. Min benen  
jau mia yuinun miandi nuku tapinxunwen. Min nuku axuanma mia inun  
min epan enabu nun matu menukin keyuxanaii. Nukun tadi nuku bian  
bestinun, iwanan, man nuku ichawashinadaka— akabu

<sup>16</sup>jawen ain Sansón anu kaxun kaxakin yuikin:

—En nuitapaii. Ea danankin min ea bechipaiama dakiki. Enabu min  
junea unanmati jancha min jatu yuishina: “Jawamenkain”, jaska min jatu  
yuishina eadi min ea yuiamadiki— aka

Sansónen kemakin yuikin:

—En epa inun en ewa en jatu yuiamadiki. ¿Jaskakin mia besti en mia  
yuiai?— aka

<sup>17</sup>ana xaba dabe inun dabeki kaxakunkainkin Sansón bikajaidawaiwen  
taexun atimas séptimo día Sansónen jawen ain jawada yuia janua jawaida  
kaxun jawenabu yuia <sup>18</sup>7 día badi jikiaya bedunanbun Sansón yuikin:

“¡Jawada batapajaida betsan binua jayamaki. Bunaki!

¡Jawada kushipajaida betsan binua jayamaki. Leónki!”

akabu

Sansónen jatu kemakin:

“En ain man yukakin bikawamadan,  
jaskatan man yuiama ikeanaii”,

jatu wa

<sup>19</sup>januxun Jehován Yushinin Sansón kushipawaken Filisteo nawabun  
mae betsa Ascalón anu kaxun 30 junibu jatu detekin tenanxun jatun beyusti  
tadi pepa jatu bianxun buxun jawen junea unanmati jancha tapintan jabun  
yuishinabu jaska jatu yubashina ja tadi jatu manakukin inankin keyutan  
sinatajaidai jawen epan jiwe anu chintunkainken <sup>20</sup>Sansón jawen ainki sinatakin  
jenebainshinken jawen epan Sansónen jaibu betsa jawen ain inanikiaki.

**15** <sup>1</sup>Xaba ichapa kaya xekiwan tsekaiбутian jawen ainki bai kakin  
jawen daewai kanun ixun cabra bake buxuan jawen jiwe anu  
jikitan Sansónen jawen kuka yuikin:

—En ainen dintu anu jikikain en uin kaitsa— aka

jakia jawen kukan jikimama nemakin <sup>2</sup>yuikin:

—En ainbu bake iyua min ana bechipaiama dabanen en shinainmaki.  
Jaskaken min jaibu betsa en inainmaki. Jaska biaimaken jawen betsa  
maxku ja binua jawenduajaida jayaki. Ja biwe— aka

<sup>3</sup>jakia Sansónen kemakin yuikin:

—Filisteo nawabu en jatu kupiaidan, natianan, ena chakabumaki.  
Jabun dukun ea chakabuwakin taewaimabuki— ikaini

<sup>4</sup>kaxun benabaunkin 300 kaman inu achikubaunkin ichawatan dabe tibiki jawen jina chaipa ketaxdabexun paniwan pechush ja dabe tibiki nea keyuxun <sup>5</sup>june buxun Filisteo nawabun xekiwan bai ichapa anu paniwan pechush ja kaman inu tibikia chi dekuxun jatu nichian datei kushibainkin jede xadabaunkin xekiwan mania inun tsekadiabuma anudi kawankin janu chiwen tima akeakebauna ji iki menubainkin jatun uva bai inun olivo bai dikabi jatu menun keyuan <sup>6</sup>janua: “¿Tsuashianmen?” iwanan, Filisteo nawabu juni ichapabu yuka ibaunkin jatun ashian Sansón ninkatan ja Sansónan, jawen dais Timnát mae anuatun ainbu bimabiamaxun mebinxun jawen jaibu inainmawen taexun jawen kukaki sinatakin ashianki, ibaini buxun Filisteo nawabun unantan ja ainbu inun jawen epa achibain jatu menu keyuabun <sup>7</sup>jatuki Sansón nukutan jatu yuikin:

—Jaska man ea chakabuwashinawen taexun en matu kupikin keyudiana en juindukuntidumaki. Diosun ea ninkaya xabakabi janchai en yubakaii— jatu watan

<sup>8</sup>sinatajaidakin jatu kupibaunkin jatu xau teke keyukin ichapa tenantan janua paxai Etam mishki mati anu kini tanpe medan Sansón jiwei kayuken

**Sansónen jaki sinataibu asno kui xauwen jatu  
detekin keyunikiaki, na janchadan**

<sup>9</sup>Jacobun bake Judán enabun maiwan pakea anu Filisteo nawa juni ichapabu buxun jatun mae betsa Lehi dapi jatun tadi jiwe puntebaunabu <sup>10</sup>Judán enabu jatuwen datekin betsabun jatu yukakin:

—¿Jaskakin man nuku detenun ika bekanxumen?— jatu wabu jabun kemakin yuikin:

—Matu detenun ika nun juamaki. Sansónen chakabuwakin nuku ichakajaida washinawen taexun ja besti achitan jaska nuku ichakawashina keska wadiakin kupikatsi nun achinun ika juxuki— jatu wabu

<sup>11</sup>jatu jaska wabu ninkabaini Mati Etam anu mishki kini tanpe anu 3,000 Judán enabu buxun Sansón banabimakin yuikin:

—Filisteo nawabu kushipajaidabuki. Nukudan, nun jaskamaki. ¿Jaskakin min nuku jatu datemai?— akabu

Sansónen jatu kemakin yuikin:

—Padankin jaska ea ichakawaimabu keska wakin eandi jabiaskadi wakin en jatu kupishinaki— jatu wa

<sup>12</sup>januxun jabun kemakin yuikin:

—Nuku juidan, achitan Filisteo nawabu mia inankatsi iki nun juxuki— akabu

Sansónen jatu kemadiakin:

—Man matun ea tenanmamen, ja dukun ea yubakanwen, Diosun matu ninkayadan— jatu wa

<sup>13</sup>Sansón yui pewakin:

—Chanima nukun nun mia deteamaki. Filisteo nawabu mia inankatsi nun mia achi bestinun ika juxuki— atan achitan dispi bena dabewen jawen meken dabe pechiudi neakin yudayabi nea mestenwantan janu junea jiwea anua taxnimabidankin iwekin

<sup>14</sup>mae Lehi anu jawenabun Sansón Filisteo nawabu jatu iyuxunabu bechibidani jatuki nukui jatun tadi jiwe anua kainbidani benimajaidai sai sai ibidanaibun Jehová Yushinin Sansón kushipawaya jawen punyanyabi jawen meken dispiwen neaxun iweabu dasibi tese kaini dispi menua keskai nidi iki keyuaya <sup>15</sup>jawen meken anu jawa tsumamabia asno kui chapudiana xetaya daka bechitan jawaida bitan jawen jatu detebaunkin 1,000 Filisteo nawabu tenantan <sup>16</sup>jaska jatu waxukidi yuikin:

“Asno kuiwen yudabu detekin

en jatu manchin dabe inun besti waxuki.

Asno kuiwen 1,000 junibu en tenanxuki”,

itan

<sup>17</sup>asno kui janu putabain kenakin: “Na matidan, Ramat-lehiki”, anikiaki, nukun janchawen yuiadan “Asnon Kui Matiki”, akinan.

<sup>18</sup>Januxun unpax manujaidakin Jehová kenatan yuikin:

—¿Min ea medabewa jatu detekin en maemakin keyubiaxuken jaskakin natian unpax manui mia ikunwanbuma anua en mawaya min ea jeneai?— aka

<sup>19</sup>ninkatan Lehi anuxun Diosun unpax tuekin bepenxunkin puemaya ja unpax Sansónen akin xetsekekin jenetan shinan chankain benimakin chacha unpax tuea kenakin: “En-hacoréki”, anikiaki. Nukun janchawen yuiadan: “Yuka Tuea Chachaki”, ani na jabiatian nun uindiatidubuki.

<sup>20</sup>Ja maiwan jidabi Filisteo nawabun Israelin enabu jatu yunukin ichakawaibutian 20 año kaya Israelin enabun Sansón jatun unanti wanika kushipa medabenan xanen ibui jiweyunikiaki.

### Mae ewapa Gaza anu Sansón kanikiaki, na janchadan

**16** <sup>1</sup>Xaba betsatian uintanun ika Filisteo nawabun maewan Gaza anu Sansón kai jikitan ainbu jininipa dasibitun memis ja ainbu anu jawen jiwetan jabe uxatanun ika ka jikiken <sup>2</sup>Sansón jatun maewan anu ma jikia dasibibun ninkakin unantan achikatsi badi jidabi jatun mae kexebaunabu jatun beputi tibi mekea mapua ibai ma badi kaya uxai bukin shinain yuinamei: “Penama bestenkain Sansón detekin tenanankanwen”, itan buabun <sup>3</sup>jakia Sansón yamenapun ainbube besti ishin jabiatandi jawaida Sansónen ainbu chibutukaini kakin mae janu jikiti xui anu june bepubiabun jawen beputi chibuyabis tasketan dasibi iabainkin chai buxun mae betsa Hebrón besusi mati mamaki mapebain beputi kepinikiaki.

**Ainbu betsa Dalila Sansónen bechipainikiaki, na janchadan**

<sup>4</sup>Jerusalén anua ianenwankidi kai napanpa jawen kena Sorec anu mae pishta anu Filisteo nawa ainbu jawen kena Dalila jiwea uinkin Sansónen bechipajaidai jabe jiweaya <sup>5</sup>Filisteo nawa xanen ibubu Dalila uin kaxun yuikin:

—Sansón bepadantan ¿jania jawen kushipajaida juimenkain? nuku tapinxunwen. Jaska watan achixun nun nea ana paxamaken nun maematidumenkainan. Jaska wakin chanima min nuku tapinxuna nukundi bestibu tibi mia duawakin 1,100 plata pei jexe nun mia inanxanii. Nukun jancha ikonwankin nuku pewaxunwen— akin jaska yubatan chintunbainabun

<sup>6</sup>jaska wawanabu Dalilan Sansón yukakin:

—Ea benimawakin ea tapinmawe, jania min kushipajaida juimenkainan. Jau min pekayamanun ¿jaska wakin tsuan mia neatidumen, mia maemakatsidan?— aka

<sup>7</sup>padankin Sansónen yuikin:

—<sup>7</sup>kanun dispi benajaida tsusindiamawen tsuanda ea neajaidabu en kushipa en benutiduki, juni kushipa midin keskaidan— aka

<sup>8-9</sup>ninkabain xanen ibubu banabima <sup>7</sup>kanun dispi benajaida tsusindiana bexun inanbu uxajaida dakaken jawen jiwe anu juni kushipabu ichapa jatu junetan Dalilan Sansón neajaidatan datekin jui kushipawen kenakin yuikin:

—Sansóneen, mia achinun ika Filisteo nawabu bekanikiki— aka bestenkauankin dispi xeni menua keska ja kanun dispi dasibi Sansónen bikama jawaida tesa keyuxuken jaskatan jania jawen kushipajaida juimenkain unankin tapianbuma <sup>10</sup>jaska washinawen taexun Dalilan Sansón yuikin:

—Chanichakakin min ea padanshinaki. Jakia eskatianan, ana ea padanma ea yui kayabiwe, jaskatan mia neabu min paxatidumadan— aka

<sup>11</sup>ana padankin yuikin:

—Dispi ewapa bena tsuan mediamawen ea neajaidabu en kushipa en benutiduki, juni kushipa midin keskaidan— aka

<sup>12</sup>ana uxajaidadiaken jawen jiwe anu juni kushipa ichapa ana jatu junediatan Dalilan dispi ewapa benajaida bixun Sansón daneakin pejaida watan jui kushipawen kenakin yuikin:

—Sansóneen, Filisteo nawabun mia achinun ika bekanikiki— aka bestenkauankin jabiasyadi wakin dispi ewapa benabiaken dian mesi pishta keska wakin jawaida ana tesa keyudiaken jabun achinun ikaibun uintan taxniabumaken <sup>13</sup>xaba betsatian meshu juaya Dalilan ana Sansón bepadankin yukakin:

—¿Jaskakin ea yui pewama chanichakakin min ea padankubainai? Ea yuiwe. ¿Tsuana jaska watan mia nea pewatidubumen?— aka

ana padankin yuikin:

—En bu paxkakin 7 pikuntan bachi timakin ja en bu tibi min kapikunxu mistutan jaki ea timakubainkin mestenwantan jaska watan ji kupa kenuwen maiki seukin min jawen ea mestenwantiduki. Min ea jaska wa en kushipa en benutiduki, juni kushipa midin keskaidan— aka

Sansón uxanxun jawen bu paxkakin 7 pikunwantan bachi timakin jawen bu pikun mistutan timakubainkin menetan <sup>14</sup>ja ji kupawen maiki seukin mestenjaidawatan ana jui kushipawen kenakin yuikin:

—Sansóneen, ma mia achinun ika mianu Filisteo nawabu bekanikiki— aka bestein benikauankin ja jawen seua betsekin ja jaki bu timakin mestenwanxu nasa keyuaya <sup>15</sup>jaska wai uintan Dalilan ana yuikin:

—Min ea bepadani chanichakai ikaii. “En mia bechijaidaii”, ibiakini xabakabi min ea yuiama ikunkainaii. Dabe inun bestiki min eki kaxeaii. Jania min kushipa juai min ea yuidiamaki— akin

<sup>16</sup>jawenchains xaba tibi jabias yukakin daketapajaida wakubaina bika tenei mawakatsis ikin <sup>17</sup>atimas Sansónen jakidi jawen junea kushipa chanima xabakabi Dalila yuikin:

—En nanei taei bebunkidi medibi Diosuna wakin Nazareo ea wani en jiwekunkainaiwen taexun en bu tsuan ea mextetidubumaki. Tsuanda en bu ma ea mexteabudan, en kushipa benui en ma babuaii, juni kushipa midin keskaidan— aka

<sup>18</sup>atimas jawen junea kushipa ma yui kayabia Dalilan unantan Filisteo nawa xanen ibubu anu jawen jancha bumakin yuikin:

—Jawen kushipa nemati ma ea yuixuki. Achidi bekanwen— jatu wa ninkatan ikunwanbidani bestibu tibi peiya beabu jawen jiwe anu jatu junexun

<sup>19</sup>Dalilan jawen kishiki datanxun Sansón uxankin jawen bu paxkaxun 7 waxun kapikunshina jau mextenun juni betsa kena juxun mextekin keyujaidatan kaya Sansónen jawen kushipa benua babuaya ichakawakin <sup>20</sup>jui kushipawen Dalilan ana kenakin yuikin:

—Sansóneen, mia achinun ika Filisteo nawabu mia anu bekanikiki— aka bestein jaska imis keskai dabanen jatu detenun ika benibiakauana Jehován ana jawen kushipa inanma dapaxkakin jenea Sansónen unanma <sup>21</sup>ma babuken Filisteo nawabun achixun nupewen jawen bedu tsekatan maewan Gaza anu iyukin bronce mane dispi chiwetameyawen neaxun janu bichiti jiwe medanxun xekiwan denekin dudumisbu anu dayamakin xaba tibi jawen deneti mishki ewapa sibanmakin dayamakubainaibun <sup>22</sup>ana jawen bu ewai benei taebidanaya

### Sansón mawanikiaki, na janchadan

<sup>23</sup>Sansón Filisteo nawabun achikin maemaimabuwen taea benimai jaki beyuskin jawen mekenika yushin Dagón kenwankin yuinaka tesenxun menukin keyuxunun ika Filisteo nawa xanen ibubu dasibi bei ma ichatan kantakin:

“Nukuki sinatakin Sansónen nuku ichakawabiamisken nukun mekenika yushibubun nuku achimaimaki”, iwanan,

<sup>24</sup>Jawenabun kenwain yuda ichapabun uin bekin jatun yushibu jabundi kenwain kantakin yuikin:

“Sansón nukuki sinatakin nukun bai menukin yamawaxun nuku ichapa tenankin keyuima nukun mekenika yushibubun nuku achimaimaki”,

ikaibun <sup>25</sup>jaskatan ana jatu maematiduma shinain ja bebunua benimai jaki kaxei beyuskatsi jatun bichiti jiwe anua jau Sansón iwenunbun jatu yunuabu buxun Sansón iwexun mishki chibu dabe jatun kenwanti jiwe namakis nichintushitan jaki kaxei beyusaibun <sup>26</sup>januxun bedunan metsunbaina Sansónen yuikin:

—Ja mishki chibu dabe matun kenwanti jiwe namakis ea mepindabewe, en jaki mestentan niaidan— aka jaska yuka bedunan iyuxun mepian

<sup>27</sup>Jatun yushibubu kenwanti jiwe ewapa anu Filisteo nawa xanen ibubu dasibi ma jikiabu junibu inun ainbuaibu midima matabu janua manaundi mishki tapa anuxun Sansón ichakawai jaki kaxeaibu 3,000 yudabun manaundixun jatu uiaibun <sup>28</sup>jui kushipawen Sansónen Jehová kenakin yukakin: “Jehováan, en mia ea akin yukaii. En bedu ea tsekaimabu keska wakin en jatu dasibi kupidiai ea shinankin na jabiatian ea ana besti wakin kushipa ea inanyuwe, en ma mawaidan”, aka <sup>29</sup>Jehován ninkaya ja mishki chibu dabe namakis anu jawen nakishkunki tsauabu anu Sansónen mewedabetan <sup>30</sup>jui kushipawen yuikin: “¡Filisteo nawabu jau ebe mawanunbunwen!” ikin dasibi jawen kushipawen tu akin chibu dabe senkea jatun kenwanti jiwe pudekebain Filisteo nawa xanen ibubu dasibi inun jabube beabudiki di ikin jatu tenankin keyua Sansón jiwexun ichapa kupikin tenanbiakubidanimaxun ana jatube mawakin Sansón ja mestibia ichapa jatu tenankin binunikiaki.

<sup>31</sup>Janua ninkatan chipu jawen betsabu inun jawenabu dasibi bexun Sansónen yuda bixun buxun mae dabe Sorá inun Estaol namakis anu jawen epa Manoa maiwanibu anu jawen yuda janu maiwadianibukiaki.

20 año kaya Israelin enabun jawen jancha ninkakubainaibun unanti wanika kushipa Sansón jiwenikiaki.

\*\*\*\*\*